

SENARAI SOALAN LAZIM BERKAITAN BIDANG AMALAN YANG DIKTIRAF DAN BADAN PENGAMAL DITETAPKAN

A) SOALAN LAZIM BERKAITAN BIDANG AMALAN YANG DIKTIRAF

1. Apakah bidang amalan yang diiktiraf?

Berdasarkan Perintah PT&K (Bidang Amalan Diiktiraf) 2017 yang diwartakan pada 28 Julai 2017 dan dikuatkuasakan bermula 1 Ogos 2017, bidang amalan yang diiktiraf adalah Perubatan Tradisional Melayu, Perubatan Tradisional Cina, Perubatan Tradisional India, Homeopati, Kiropratik, Osteopati dan Amalan Pengubatan Islam.

2. Bolehkah saya mengamal bidang amalan di luar bidang amalan yang diiktiraf?

Menurut seksyen 21 Akta PT&K 2016 [Akta 775], pengamal boleh mengamal bidang amalan yang diiktiraf sahaja. Walau bagaimanapun, penguatkuasaan akta akan dijalankan secara berfasa. Sehingga akta dikuatkuasakan sepenuhnya, pengamal PT&K yang mengamal bidang amalan selain daripada bidang amalan yang diiktiraf, masih boleh mengamal bidang amalan tersebut secara bertanggungjawab dan beretika serta memastikan keselamatan pesakit sentiasa terjamin. Di samping itu, ada kemungkinan bidang amalan lain akan diiktiraf pada masa hadapan.

3. Kenapa Akta PT&K 2016 masih belum dilaksanakan sepenuhnya?

Penguatkuasaan Akta PT&K 2016 dilaksanakan secara berfasa. Pada fasa pertama, seksyen yang dikuatkuasakan melibatkan penubuhan Majlis PT&K bagi mengadakan peruntukan untuk perkara-perkara yang berkaitan dengannya dan mengenalpasti bidang amalan yang diiktiraf serta mengenalpasti badan pengamal yang ditetapkan serta kuasa Menteri untuk membuat peraturan. Fasa kedua pula, melibatkan penetapan tarikh untuk penguatkuasaan seksyen yang melibatkan pendaftaran pengamal dalam bidang amalan yang diiktiraf. Manakala fasa terakhir pula ialah penguatkuasaan penuh akta tersebut.

4. Saya pernah berdaftar dengan salah satu badan pengamal yang diiktiraf oleh KKM, perlukah saya berdaftar juga dengan Majlis PT&K?

Pendaftaran dengan Majlis PT&K adalah **diwajibkan** untuk semua pengamal PT&K yang ingin mengamal di dalam bidang amalan yang diiktiraf, walaupun pernah berdaftar dengan mana-mana badan pengamal sebelum ini. Sehingga kini, seksyen Akta PT&K 2016 yang melibatkan pendaftaran pengamal masih belum dikuatkuasakan lagi. Pendaftaran hanya akan dimulakan pada tarikh yang

akan ditetapkan oleh YB Menteri Kesihatan. Apabila proses pendaftaran dimulakan, tatacara yang berkaitan akan dimaklumkan oleh pihak Majlis PT&K.

5. Apakah di antara amalan yang tergolong di bawah bidang amalan tradisional (Melayu, Cina dan India) yang diiktiraf?

Di antara amalan yang tergolong di bawah perubatan tradisional Melayu adalah seperti herba Melayu,urut Melayu dan penjagaan postnatal.

Di antara amalan yang tergolong di bawah perubatan tradisional Cina adalah seperti herba Cina, akupunktur & moksibusi dan tuina.

Perubatan tradisional India merangkumi Ayurveda, Sidhha dan Unani

6. Bagaimanakah cara untuk menjadikan bidang amalan yang saya amalkan sekarang terpilih menjadi satu bidang amalan yang diiktiraf pada masa hadapan?

Dalam penguatkuasaan akta secara berfasa, pencerahan berkenaan proses pengiktirafan bidang amalan selain daripada bidang amalan diiktiraf akan dikeluarkan oleh Majlis PT&K pada suatu masa kelak.

B) SOALAN LAZIM BERKAITAN BADAN PENGAMAL DITETAPKAN

1. Perlukah saya berdaftar dengan suatu badan pengamal yang berkaitan dengan bidang amalan saya?

Keahlian dalam sesuatu badan pengamal yang merupakan satu pertubuhan bukan kerajaan (*non-governmental organisation – NGO*) merupakan urusan peribadi dan tidak tertakluk di bawah kuasa Majlis PT&K. Walau bagaimanapun, sesiapa yang ingin mengamal dalam bidang amalan yang diiktiraf wajib berdaftar dengan Majlis PT&K apabila pendaftaran dibuka kelak.

2. Apakah badan pengamal ditetapkan?

Berdasarkan Perintah Perubatan Tradisional dan Komplementari (Penetapan Badan Pengamal) 2017 yang diwartakan pada 28 Julai 2017 dan dikuatkuasakan bermula 1 Ogos 2017, badan pengamal ditetapkan adalah seperti di bawah:

Bidang Amalan Diiktiraf	Badan Pengamal Ditetapkan
Perubatan tradisional Melayu	Gabungan Pertubuhan Pengamal Perubatan Tradisional Melayu Malaysia
Perubatan tradisional Cina	Persatuan Tabib Tionghoa Malaysia (<i>Malaysian Chinese Medical Association</i>)
Perubatan tradisional India	Pertubuhan Perubatan Tradisional India Malaysia (<i>Malaysian Association of Traditional Indian Medicine</i>)
Homeopati	Majlis Perubatan Homeopathy Malaysia (<i>Malaysian Medical Homeopathic Council</i>)
Kiropraktik	Gabungan Pertubuhan Perubatan Komplementari dan Alami Malaysia (<i>Federation of Complementary and Natural Medical Associations, Malaysia</i>)
Osteopati	
Pengubatan Islam	Persatuan Perubatan, Pengubatan dan Kebajikan Islam Malaysia

3. Mengapa sebelum penguatkuasaan Akta PT&K 2016 [Akta 775] terdapat lapan (8) badan pengamal yang dilantik oleh KKM, namun selepas penguatkuasaan Akta PT&K 2016 hanya terdapat enam (6) badan pengamal yang ditetapkan sahaja?

Majlis PT&K telah bersetuju untuk menetapkan hanya satu badan pengamal sahaja dilantik untuk mewakili satu bidang amalan yang diiktiraf. Walau

bagaimanapun, untuk bidang amalan Kiropraktik dan Osteopati, kedua-dua bidang amalan tersebut diwakili oleh satu badan pengamal ditetapkan iaitu Gabungan Pertubuhan Perubatan Komplementari dan Alami Malaysia. Ini kerana Kiropraktik dan Osteopati tergolong di bawah amalan terapi Komplementari.

4. Apakah fungsi wakil badan pengamal dalam Majlis PT&K?

Menurut seksyen 43 Akta PT&K 2016, badan pengamal boleh:

- (a) Menjalankan mana-mana fungsi yang diwakilkan kepadanya oleh Majlis PT&K
- (b) Menyediakan apa-apa maklumat yang berkaitan daripada badan pengamal seperti yang diminta oleh Majlis PT&K
- (c) Menjalankan perintah dan arahan berkenaan dengan pelaksanaan fungsi seperti yang telah diwakilkan oleh Majlis PT&K.

C) PERKARA-PERKARA LAIN BERKAITAN DENGAN PENGUATKUASAAN AKTA PT&K 2016

1. Saya dimaklumkan bahawa pihak KKM menganjurkan Taklimat Akta Perubatan Tradisional dan Komplementari (PT&K) 2016 [Akta 775] serta Kewajipan Pengamal Berdaftar. Apakah tujuan taklimat tersebut?

Pelaksanaan taklimat ini adalah sebagai langkah awal untuk memastikan pengamal PT&K memahami peruntukan akta sebelum penguatkuasaan sepenuhnya. Kehadiran ke taklimat tersebut telah diwajibkan sebagai salah satu syarat untuk berdaftar sebagai pengamal di bawah Akta PT&K 2016 apabila proses pendaftaran dimulakan pada satu tarikh yang akan dimaklumkan kelak.

Objektif Taklimat:

- a) Meningkatkan kesedaran dan kefahaman pengamal terhadap Akta PT&K 2016,
- b) Menekankan tanggungjawab dan kewajipan sebagai seorang pengamal berdaftar dibawah Akta PT&K 2016,
- c) Meningkatkan kesedaran terhadap hak pesakit, syarat dan jaminan tersirat dari segi kualiti pengubatan dan keberkesanan perkhidmatan yang diberikan oleh pengamal PT&K,
- d) Memahami larangan-larangan terhadap seorang pengamal PT&K yang berdaftar,
- e) Memahami kesan dan hukuman sekiranya disabit kesalahan atau melanggar peruntukan tertentu apabila akta dikuatkuasakan dengan sepenuhnya,
- f) Menyedari peruntukan akta-akta lain yang berkaitan yang perlu dipatuhi semasa mengamalkan amalan PT&K.

Kumpulan sasaran:

- i) Pengamal PT&K yang mengamal di dalam bidang amalan yang diiktiraf.
- ii) Pengamal yang mengamal di dalam bidang amalan yang belum diiktiraf digalakkan menghadiri taklimat ini untuk mendapatkan pendedahan kepada keperluan Akta PT&K 2016 serta larangan-larangan terhadap seseorang pengamal.

Takwim penganjuran taklimat ini akan dikemaskini di laman sesawang BPTK, KKM (<http://tcm.moh.gov.my>) dari semasa ke semasa. Peserta yang hadir dan menjawab soal selidik di penghujung taklimat akan diberi Sijil Penyertaan Taklimat Akta PT&K 2016 serta Kewajipan Pengamal Berdaftar. **Pengamal PT&K dalam bidang amalan diiktiraf perlu mengemukakan Sijil Penyertaan ini sebagai salah satu kriteria pendaftaran apabila proses pendaftaran pengamal dimulakan.**

2. Apakah pendekatan yang diambil oleh KKM dalam pengawalseliaan amalan pengubatan Islam?

Majlis Perubatan Tradisional dan Komplementari (PT&K) telah bersetuju untuk meneruskan kerjasama dengan pihak Jabatan Kemajuan Islam Malaysia (JAKIM) dalam penubuhan **Lajnah Pengawalseliaan Amalan Pengubatan Islam (LAJPPI)**. Kerjasama pihak Majlis Agama Islam Negeri (MAIN)/ Jabatan Agama Islam Negeri (JAIN) akan turut dipohon untuk membantu mengawalselia amalan pengubatan Islam.

LAJPPI berfungsi untuk membantu Majlis PT&K, KKM dalam melaksanakan proses pendaftaran, pemantauan dan penguatkuasaan ke atas amalan dan pengamal pengubatan Islam di Malaysia.

3. Apakah antara usaha KKM dalam memartabatkan pendidikan PT&K di Malaysia?

Satu Jawatankuasa Teknikal Bersama akan ditubuhkan di bawah Akta Agensi Kelayakan Malaysia 2007 [Akta 679] untuk membuat penilaian akreditasi program pengajian PT&K dengan kerjasama di antara badan profesional, badan jaminan kualiti dan pihak berkepentingan yang lain demi memastikan program pengajian PT&K yang ditawarkan oleh institusi pengajian tinggi di Malaysia adalah berkualiti.

4. Apakah status pembangunan *National Occupational Skill Standard (NOSS)* dalam bidang amalan PT&K di Malaysia?

Majlis PT&K tiada halangan untuk mana-mana pihak berkepentingan yang berminat untuk membuat permohonan kepada Jabatan Pembangunan Kemahiran, Kementerian Sumber Manusia untuk pembangunan NOSS dalam bidang amalan PT&K sama ada yang diiktiraf atau tidak diiktiraf.

Namun demikian, **pembangunan sesuatu NOSS tidak menjamin pengiktirafan bidang amalan tersebut ataupun diterima sebagai kriteria pendaftaran sebagai pengamal di bawah Akta PT&K 2016.**